

聖門十六子書

先賢顓孫子傳

先賢顓孫子名師字子張陳人才高意廣外矜莊而寡誠
信孔子每教之聞聖教之後則能鞭辟近裏着己矣夫子
卦得賁喟然而嘆子張進而問曰師聞賁吉卦而嘆之乎
夫子曰賁非正色是以嘆之吾思夫質素白當正白黑當
正黑夫質文何也吾聞丹漆不文白玉不雕寶珠不飾何
也質有餘者不受飾也蓋因其文勝而默救之也子貢曰
美功不伐貴位不喜不侮不佚不傲無告是顓孫師之行

也夫子曰其不伐則猶可能其不侮百姓則仁也子張病
召申詳而語之曰君子曰終小人曰死吾今日其庶幾乎
公孫丑謂子夏子游子張皆有聖人之一體云今江南徐
州府蕭縣南三十五里堀坊村西有子張墓唐元宗時從
祀封陳伯宋封宛邱侯政和改封潁川侯咸淳間加封陳
國公尋稱陳公升十哲位明嘉靖九年改稱先賢顓孫子
關里誌

薛應旂曰余觀呂氏春秋謂子張魯之郢家學於孔子爲

天下名士顯人以終其壽此猶未足憑也及觀曾子齊衰往弔則所以惜之者當必有在矣豈終不可並爲仁哉

堂堂張也商德有鄰尊賢容衆崇德依仁入趨函丈退而

書紳升中優贈道與名新

宋張齊賢贊

通志氏族略顓孫氏媯姓陳公子顓孫仕晉子孫氏焉
顓孫師字子張孔子弟子顓孫子英見說苑

謹按左氏傳莊公二十二年陳公子完與顓孫奔齊
顓孫自齊來奔杜注云不書非卿然則來奔者奔魯

也奔魯則仕於魯矣通志氏族略云仕晉蓋字之誤也山東通志云顓孫氏本媯姓陳公子顓孫仕晉子孫氏焉此沿夾漈之誤未及更正者也道光壬辰嘉平月崇川後學馮雲鵬謹識

顓孫子書

崇川馮雲鵬校刊

年表

周景王十七年魯定公七年戊戌子張生

顓孫氏之先出自黃帝至舜之後封於陳數傳至公子顓孫仕晉因以名爲姓生子顓孫強強生健健生齊齊生姜姜生三子曰子張曰子莫曰子英因楚子滅陳子莫子英散於四方苗裔失序子張之生也其母感虹降有孕生而彩雲覆屋異香繞室者三日

丁未年十歲氣度俊偉天資明睿因孔子在陳遂受業
習禮容少孔子四十八歲弟子中惟子張最幼

庚戌十三歲從孔子自陳如蔡

是年魯哀公四年

辛亥十四歲從孔子自蔡如葉

壬子十五歲楚昭王使人聘孔子從孔子如楚阨於陳
蔡楚子興師迎之乃得至楚秋自楚反乎衛

丁巳二十歲魯使人以幣迎孔子自衛反魯與閔子子

貢諸賢從孔子如蕭止天門山遇雨曬書因以名臺
迄今山上有夫子崖聖人場東南又有貢山張山焉
及至魯娶曾氏見其絃歌不輟博雅從容咸以堂堂
稱之

戊午二十一歲從孔子叙書傳禮記釐定樂章公明儀
之徒受業於門傳經自此始

己未二十二歲有父喪公明儀相焉稽顙之禮一從其
至

庚申二十三歲當西狩獲麟孔子制春秋之義悲憤絕筆弟子身通六藝者七十二人子張學益進是年生
申詳

辛酉二十四歲旣除喪而見夫子予之琴和之而和彈之成聲作而曰先王制禮不敢不至焉蓋賢者以禮制心故如此

壬戌二十五歲四月巳丑孔子卒塋魯城北泗上同諸子從冢而家者百餘皆服心喪三年

甲子二十七歲治任將歸因楚子滅陳遂家於蕭在今
掣牛坂東有子張故廬閔子騫爲後母所苦冬月衣
以蘆花父令御車體寒失靽掣牛而反卽其故處

周元王元年魯哀公十九年丙寅二十八歲自蕭反魯見
哀公七日不禮託僕夫而去曰臣聞君好士故不遠
千里以見七日而不禮君之好士有似葉公子高之
好龍也好乎似士而非士者也敢託而去

戊辰三十歲因孔子沒失所歸依與子夏子游以有若

言行氣象似聖人欲以所事孔子之禮事之強曾子
曾子曰不可夫子道德非有若所能彷彿也是年越
敗吳乃以兵北渡淮與齊晉諸侯會於徐州致貢於
周道經蕭

周貞定王元年魯哀公二十六年癸酉三十四歲遣子申
詳出就外傳是時申詳年十二歲

戊寅三十九歲爲申詳娶言氏子游女也

戊子四十九歲是時三家分晉田氏篡齊子張隱居不

仕惟與公明儀發明孔子之道著書立言藏之名山
已丑五十歲召申詳語之曰子思聖人之後也吾不能
窮聖人之道子當以師事之

周貞定王二十四年魯悼公元年丙申子張年五十七歲
召申詳而語之曰君子曰終小人曰死吾今日其庶
幾乎寢疾七日而卒曾子齊衰而往哭之公明儀爲
志塋於堀坊村西褚墓丹質蟻結於四隅蓋以殷士
禮尊其師也

語曰表者表彰其事也紀世紀年詳簡必書子張子
睿頴天授神契誕生雲物煥其光華星土叶其符應
太史每誌之若夫早年學道聿登金玉之堂壯志傳
經宏薦圭璋之席可謂前光後輝者矣至其晚年進
德允矣高明正命考終庶幾君子其生平之行蓋可
畧乎哉

堀坊志

顓孫子書

崇川馮雲鵠校刊

上篇

顓孫師陳人字子張少孔子四十八歲爲人有容貌資質
寬冲博接從容自務居不務立於仁義之行孔子門人友
之而弗敬

孔子常自筮其卦得賁焉愀然有不平之狀子張進曰師
聞卜者得賁卦吉也而夫子之色有不平何也孔子對曰
以其離耶在周易山下有火謂之賁非正色之卦也夫賁

也黑白宜正焉今得賁非吾之兆也吾聞丹漆不文白玉不雕何也質有餘不受飾故也

子貢對衛將軍文子曰美功不伐貴位不善不侮不佚不傲無告是顓孫師之行也孔子言之曰其不伐則猶可能也其不弊百姓則仁也詩云愷悌君子民之父母夫子以其仁爲大學之深

以上三條見家語

子張問入官於孔子孔子曰安身取譽爲難也子張曰安身取譽如何孔子曰有善勿專教不能勿措已過勿發失

言勿跼不善辭勿遂行事勿留君子入官自行此六路者則身安譽至而政從矣且夫忿數者獄之所由生也距諫者慮之所以塞也慢易者禮之所以失也墮怠者時之所以後也奢侈者財之所以不足也專者事之所以不成也歷者獄之所由生也君子入官除七路者則身安譽至而政從矣故君子南面臨官大城而公治之精知而略行之合是忠信考是大倫存是美惡而進是利而除是害而無求其報焉而民情可得也故臨之無抗民之志勝之無犯

民之言量之無狃民之辭養之無擾於時愛之勿寬於刑
若此則身安譽至而民自得也故君子南面臨官所見邇
故明不可僞也所求邇故不勞而得也所以治者約故不
用衆而譽至也法衆在內故不遠源泉不竭故天下積也
而木不寡短長人得其量故治而不亂故六者貫乎心藏
乎志形乎色發乎聲若此則身安而譽至而民自得也故
君子南面臨官不治則亂至亂至則爭爭之至又反於亂
是故寬裕以容其民慈愛以優柔之而民自得也已故躬

行者政之始也調說者情之道也善政行易則民不怨言
調說則民不辨法仁在身則民顯以佚之也財利之生徵
矣貪以不得善政必簡矣苟以亂之善言必聽矣詳以失
之規諫日至煩以不聽矣言之善者在所日聞行之善者
在所能爲故上者民之儀也有司執政民之表也邇臣便
辟者羣臣僕之倫也故儀不正則民失誓表弊則百姓亂
邇臣便辟不正廉而羣臣服汙矣故不可不慎乎三倫矣
故君子修身反道察說而邇道之服存焉是故夫工女必

自擇絲麻良工必自擇齋材賢君良上必自擇左右始故
佚諸取人勞於治事勞於取人佚於治事故君子欲譽則
謹其所便欲名則謹於左右故上者辟如緣木者務高而
畏下者滋甚六馬之離必於四面之衢民之離道必於上
之佚政也故上者尊嚴而絕百姓者卑賤而神民而愛之
則存惡之則亡也故君子南面臨官貴而不驕富恭有本
能圖修業居久而譚情通暢而及乎遠察一而關於多一
物治而萬物不亂者以身爲本者也故君子莅民不可以

不知民之性達諸民之情既知其以生有習然後民特從命也故世舉則民親之政均則民無怨故君子莅民不臨以高不道以遠不責民之所不能今臨之明王之成功則民嚴而不迎也道以數年之業則民疾疢則辟矣故古者冕而前旒所以蔽明也戴紘塞耳所以弇聰也故水至清則無魚人至察則無徒故枉而直之使自得之優而柔之使自求之揆而度之使自索之民有小罪必以其善以赦其過如死使之生其善也是以上下親而不離故惠者政

之始也政不正則不可教也不習則民不可使也故君子
欲言之見信也者莫若先虛其內也欲政之速行也者莫
若以身先之也欲民之速服也者莫若以道御之也故不
先以身雖行必鄰也不以道御之雖服必強矣故非忠信
則無可以取親於百姓矣外內不相應則無可以取信者
矣四者治民之統也

大戴禮記

顓孫子書

崇川馮雲鵷校刊

中篇

子張問曰堯舜之世一人不刑而天下治何則以教誠而愛深也龍子以爲一夫而被以五刑敢問何謂孔子曰不然五刑所以佐教也龍子未可謂能爲書也

書曰茲殷罰有倫子張問曰何謂也孔子曰不失其理之謂也今諸侯不同德國君異法折獄無倫以意爲限是故知法之難也子張曰古之知法者與今之知法者異乎孔

子曰古之知法者能遠今之知法者不失有罪不失有罪其於怨寡矣能遠則於獄其防深矣寡怨近乎濫防深治乎本書曰維敬五刑以成三德言敬刑所以爲德也

書曰若保赤子子張問曰聽訟可以若此乎孔子曰可哉古之聽訟者惡其意不惡其人求所以生之不得其所以生乃刑之君必與衆共焉今之聽訟者不惡其意而惡其人求所以殺是反古之道也

子張問曰聖人受命必受諸天而書云受終於文祖何也

孔子曰受命於天者湯武是也受命於人者舜禹是也夫
不讀詩書易春秋則不知聖人之心又無以別堯舜之禪
湯武之伐也

子張問曰禮丈夫三十而室昔者舜三十徵庸而書云有
鰥在下曰虞舜何謂也曩師聞諸夫子曰聖人在上君子
在位則內無怨女外無曠夫堯爲天子而有鰥在下何也
孔子曰夫男子二十而冠冠而後娶古今通義也舜父頑
母嚚莫克圖室家之端焉故逮三十而謂之鰥也詩云娶

妻如之何必告父母父母在則宜圖婚若已歿則已之娶必告其廟今舜之鰥乃父母之頑嚚也雖堯爲天子其如舜何

子張曰女子必漸乎二十而後嫁何也孔子曰十五許嫁而後從夫是陽動而陰應男唱而女隨之義也以爲纁組紉織經者女子之所有事也黼黻文章之義婦人之所有大功也必十五以往漸乎二十然後可以通乎此事通乎此事然後乃能上以孝於舅姑下以事夫養子也

子張問書云奠高山何謂也孔子曰高山五嶽定其差秩
祀所視焉子張曰其禮若何孔子曰牲幣之物五嶽視三
公小名山視子男子張曰仁者何樂於山孔子曰夫山者
巋然高子張曰高則何樂爾孔子曰夫山草木植焉鳥獸
蕃焉財用出焉直而無私焉四方皆伐焉直而無私興吐
風雲以通乎天地之間陰陽和合雨露之澤萬物以成百
姓咸饗此仁者之所以樂乎山也

以上七條見孔叢子

孔子卦得賁喟然仰而歎息意不平子張進舉手而問曰

師聞賁者吉卦而歎之乎孔子曰賁非正色也是以歎之
吾思也質素白當正白黑當正黑夫質又何也吾亦聞之
丹漆不文白玉不雕寶珠不飾何也質有餘者不受飾也
說苑

孔子謂子張曰師吾欲聞彼將以改此也聞彼而不改此

雖聞何益

中論

孔子過康子子張子夏從孔子入坐二子相與論終日不
決子夏辭氣甚隘顏色甚變子張曰子亦聞夫子之議論

邪徐言問問威儀翼翼後言先默得之推讓巍巍乎蕩蕩
乎道有歸矣小人之論也專意自是言人之非瞋目搥腕
疾言噴噴口沸目赤一幸得勝疾笑盥盥威儀固陋辭氣
鄙俗是以君子賤之也

韓詩外傳

子張見魯哀公七日而哀公不禮託僕夫而去曰臣聞君
好士故不遠千里之外犯霜露冒塵垢百舍重趼不敢休
息以見君七日而君不禮君之好士也有似葉公子高之
好龍也葉公子高好龍鈎以寫龍鑿以寫龍屋室雕文以

寫龍於是夫龍聞而下之窺頭於牖拖尾於堂葉公見之
棄而還走失其魂魄五色無主是葉公非好龍也好夫似
龍而非龍者也今臣聞君好士故不遠千里之外以見君
七日不禮君非好士也好夫似士而非士者也詩曰中心
藏之何日忘之敢託而去

新序

子張問於滿苟得曰盍不爲行無行則不信不信則不任
不任則不利故觀之名計之利而義真是也若棄名利反
之於心則夫士之爲行不可一日不爲乎滿苟得曰無恥

者富多信者顯夫名利之大者幾在無恥而信故觀之名計之利而信真是也若棄名利反之於心則夫士之爲行抱其天乎子張曰昔者桀紂貴爲天子富有天下今謂臧聚曰汝行如桀紂則有忤色有不服之心者小人所賤也孔子墨翟窮爲匹夫今謂宰相曰子行如孔子墨翟則變容易色稱不足者士誠貴也故勢爲天子未必貴也窮爲匹夫未必賤也貴賤之分在行之美惡滿苟得曰小盜者拘大盜者爲諸侯諸侯之門義士存焉昔者桓公小白殺

兄入嫂而管仲爲臣田成子常殺君竊國而孔子受幣論則賤之行則下之則是言行之情悖戰於胷中也不亦拂乎故書曰孰惡孰美成者爲首不成者爲尾子張曰子不爲行卽將疏戚無倫貴賤無義長幼無序五紀六位將何以爲別乎滿苟得曰堯殺長子舜流母弟疏戚有倫乎湯放桀武王殺紂貴賤有義乎王季爲適周公殺兄長幼有序乎儒者僞辭墨者兼愛五紀六位將有別乎且子正爲名我正爲利名利之實不順於理不監於道吾日與子訟

於無約曰小人徇財君子徇名其所以變其情易其性則
異矣乃至於棄其所爲而徇其所不爲則一也故曰無爲
小人反徇而天無爲君子從天之理若枉若直相而天極
面觀四方與時消息若是若非執而圓機獨成而意與道
徘徊無轉而行無成而義將失其所爲無赴而富無徇而
成將棄而天比于剖心子胥抉眼忠之禍也直躬證父尾
生溺死信之患也鮑子立乾勝子不自理廉之害也孔子
不見母匡子不見父義之失也此上世之所傳下世之所

語以爲士者正其言必其行故服其殃離其患也

莊子

第作其冠神禪其辭禹行而舜趨是子張氏之賤儒也

荀

子非十二子篇

夫子沒後散於天下設於中國成百氏之源爲綱紀之儒
居環堵之室華門圭竇牖繩樞併日而食以道自居者
有道之儒子思氏之所行也衣冠中動作順大讓如慢小
讓如僞者子張氏之所行也顏氏傳詩爲道爲諷諫之儒
孟氏傳書爲道爲疎通致遠之儒漆雕氏傳禮爲道爲恭

儉莊敬之儒仲梁氏傳樂爲道以和陰陽爲移風易俗之
儒樂正氏傳春秋爲道爲屬辭比事之儒公孫氏傳易爲
道爲潔淨精微之儒

羣輔錄

黼孫子書

崇川馮雲鵬校刊

下篇

子張問入官於孔子子曰安身取譽爲難子張曰爲之如何子曰已有善勿專教不能勿怠已過勿發失言勿倚不善勿遂行事勿留君子入官具此六者則身安譽至而政從矣且夫忿數者獄之所由生也距諫者忠之所以塞也慢易者禮之所以失也怠惰者時之所以後也奢侈者財之所以不足也專獨者事之所以不成也君子入官除此

六者則身安譽至而政從矣故君子南向臨官大域之中而公治之精智而略行之合是忠信考是大倫在是美惡進是利而除是害無求其報焉而民之情可得也夫臨之無抗民之志勝之無犯民之言量之無侵民之辭養之無擾於其時愛之無寬於刑法若此則身安譽至而民德也君子以臨官所見於邇故明不可蔽所求於邇故不勞而得也所以治者約故不用衆而譽立凡法象在內故法不遠而源泉不竭是以天下積而本不寡長短得其量人志

治而不亂政德貫乎心藏乎志形乎色發乎聲若此而身
安譽至而民咸自治矣是故臨官不治則亂亂生則爭之
者至爭之至又於亂明君必寬宥以容其民慈愛以優柔
之而自得矣行者政之始說者情之導也善政行易而民
不怨言調說和則民不變法在身則民象之明在已則民
顯之若乃供已而不節財則財利之生者微矣貪以不得
則善政必簡矣苟以亂之則善言必不聽也詳以納之則
規諫日至言之善者在所日聞行之善者在所能爲故君

上者民之儀也有司執政者民之表也邇臣便辟者羣僕之倫也故儀不正則民失表不端則百姓亂邇臣便辟則羣臣汙矣是以人君不可不敬乎三倫君子修身反道察理言而服之則身安譽至終始在焉故夫女子必自擇絲麻良工必自擇完材賢君必自擇左右勞於取人佚於治事君子欲譽則必謹其左右爲上者辟如緣木焉務高而畏下滋甚六馬之乖離必於四達之交衢萬民之叛道必於君上之失政上者尊嚴而危民者卑賤而神愛之則存

惡之則亡長民者必明此之要故南面臨官貴而不驕富而能供有本而能圖末修事而能建業久居而不滯情近而暢乎遠察一物而貫乎多治一物而萬物不能亂者以身本者也君子涖民不可以不知民之性而達諸民之情既知其性又習其情然後民乃從命矣故世舉則民親之政均則民無怨故君子涖民不臨以高不導以遠不責民之所不爲不強民之所不能以明王之功不因其情則民嚴而不迎篤之以累年之業不因其力則民引而不從若

責民所不爲強民所不能則民疾疾則僻矣古者聖王冕
而前旒所以蔽明也紘紕充耳所以掩聰也水至清則無
魚人至察則無徒狂而置之使自得之優而柔之使自求
之揆之度之使自索之民有小罪必求其善以赦其過民
有大罪必原其故以仁輔化如有死罪其使之生則善也
故德者政之始也政不和則民不從其教矣不從教則不
習不習則不可得而使也君子欲言之見信也莫善乎先
虛其內欲政之速行也莫善乎以身先之欲民之速服也

莫善乎以道御之故雖服必強自非忠信則無可以取親於百姓者矣內外不相應則無以取信於庶民者矣此治民之至道矣入官之大統矣子張旣聞孔子斯言遂退而記之

子張問曰書云高宗三年不言言乃雍有諸孔子曰胡爲其不然也古者天子崩則世子委政於冢宰三年成湯旣歿太甲聽於伊尹武王旣喪成王聽於周公其義一也子張有父之喪公明儀相焉問啟顙於孔子孔子曰拜而

後啟顏頤乎其順啟顏而後拜頤乎其至也三年之喪吾

從其至也

以上三條見家語

子張病召申詳而語之曰君子曰終小人曰死吾今日其庶幾乎

子張死曾子有母之喪齊衰而往哭之或曰齊衰不以弔曾子曰我弔也與哉

子張之喪公明儀爲志焉褚幕丹質蟻結於四隅股士也以上三條見檀弓

子張欲行辭於夫子願責一言以爲終身之用夫子曰百行之本忍之爲上子張曰何以爲忍夫子曰天子忍之國無害諸侯忍之成其大官吏忍之進其位夫婦忍之終其世兄弟忍之家必富朋友忍之全其義自身忍之無患累子張曰何爲不忍夫子曰天子不忍國空虛諸侯不忍喪其軀官吏不忍刑罰誅夫妻不忍令身孤兄弟不忍必分居朋友不忍情意疎自身不忍禍難除子張曰善哉善哉難忍難忍子曰非人不忍不忍非人

事林廣記

子張欲行辭於夫子願一言以爲終身之用夫子曰百行之本忍之爲上子張曰何以謂忍夫子曰大悟以脫人之陷我奮發以破人之量我堪言以免人之利我危行以消人之鄙我靜聽以處人之擾我游藝以備人之棄我厲操以止人之惡我直道以伸人之屈我洞徹以解人之疑我量力以濟人之求我盡忠以報人之任我弊端切須勿始於我凡事無可知私於我聖賢每存心於無我天下之事盡其在我

堀坊志

顓孫子莫子張之弟也公孟高嘗問君子之禮於顓孫子
莫子莫曰去而外厲與爾內折色勝而心自取之公孟不
知以告曾子曾子曰大哉言乎夫外厲者必內折色勝而
心自取之者必爲人役是故君子德行成而容不知聞識
博而辭不爭知慮微達而能不愚也子莫之後散處四方
苗裔失序

城坊志

謹按孟子稱子莫執中趙岐以爲子莫魯之賢人也
其性中和專一者也第其學無所考惟說苑修文篇

載公孟子高問禮一事而曾子稱之卽此三言而性
之中和專一可概見矣通志言顓孫子英見說苑今
本無之或一人而異其名乎觀堀坊志以爲子張子
莫子英兄弟三人子莫爲子張之弟家乘之言當必
有所受矣道光壬辰嘉平月崇川後學馮雲鵬謹識
申詳魯人子張之子也定公十四年衛公叔戌奔魯謂申
詳曰吾於子思親而敬之子思未吾察也申詳以告曰人
求親敬於子子何辱焉子思答曰義也申詳曰請聞之答

曰公叔氏之子愛人之同已慢而不知賢夫其親敬非心
見吾所可親敬也以人口而親敬吾則亦以人口而疏慢
吾矣申詳曰其不知賢奈何答曰有龍穆之徒好飾弄辭
說觀於坐席相人眉睫以爲之意天下之淺人也而公叔
子交之橘子良脩實而不脩名爲善不求人知不撞不發
如大鍾然天下之深人也而公叔子與之同邑而弗能知
此其所以爲愛同已而不知賢也申詳曰吾乃今知公叔
子同而不和誠小人之驕者也遂謝之哀公十八年從子

張家於蕭 堀坊志

薛應旂曰公叔戌愛龍穆之同已而不知橋子良之賢其親敬子思豈誠以其賢哉蓋子思之在當時其名顯而龍穆亦時之文人也故特附之以假重焉耳嗚呼公叔戌常有而子良不常有誰其知之若申詳則直斥爲小人之驕者可不謂賢哉

公明儀魯南武城人也爲子張門人甚尊其師

牟子曰公明儀爲牛彈清角之操伏食如故非牛不聞不

合其耳矣轉爲蚩蚩之聲孤犢之鳴卽掉尾奮耳蹠蹠而聽

公明高子張弟子 以上三條見堀坊志

謹按禮檀弓云子張之喪公明儀爲志焉正義曰公明儀是其弟子亦如公西赤爲章識焉此公明儀又爲曾子弟子故祭義云公明儀問於曾子曰夫子可以爲孝乎是也惟公明高趙岐以爲曾子弟子而堀坊志以爲亦子張弟子或相傳有此說也道光壬辰

嘉平月崇川後學馮雲鵬謹識

顓孫子書

崇川馮雲鵬校刊

祠墓古蹟

顓孫子子張祠在鄒縣南關明萬歷間建

山東通志

先賢顓孫子師墓在蕭縣南三十里春秋致祭

申詳墓在蕭縣堀坊村

三賢祠在蕭縣白茅山祀閔子子張顏率

以上三條見江

南通志

先賢子張子祠在蕭縣南三十里墓北六十二代孫岱改

建墓東北二十餘步湖水泛漲棟宇傾圯六十三代孫承
惠遷於邑之西關外創獻堂三楹銘恩閣一座順治七年
六十四代孫佐聖重加營造塗聖聿新每年春秋二仲上
丁有司齋祀文廟祭之明日專祀於杼秋門西賢人里祭
畢率師生祀三賢祠

先賢子張子墓在蕭縣南三十里堀坊村東距永堙湖十
里浮緩湖五里西距瓦橋關十里南臨西流淇河七十步
東北距昇高山五里西北距故宅八里墓高丈餘廣圓一

百二十司古樹環列有漢唐宋以來石碣多沉陷明正德八年邑侯馮裕立石尚存

祭田五頃四十畝額設奉祀生員四名墓夫一名

申詳墓在子張墓東南相距數武臨河濱議築堤護之

三賢祠祀閔子騫子張子顏子柳也在蕭子舊國之南三里許隔一衣帶水古樹懸崖相傳爲仙樵爛柯處邑中勝槩也顏辛魯人字子柳封蕭伯

堀坊八景一曰冒陵登翠冒山在其北十里峻削孤峙松

檜蒼鬱如青屏一幅。曰寒山鞭蘆在西北八里。閔子御車失鞵。因名。一曰石牛怪跡在東北三里。山阿石狀如水牛中腹嵌空。吞吐雲氣。一曰藏馬古寺在其北九里。漢高帝爲楚兵逐急。藏馬於此。又匿古井中。蛛網覆之一。曰白雲竒洞在西北八里。薛村山上有先賢藏書洞。內如石航。中通一孔。入之幽深數里。可容萬人。時有白雲出沒。四面峭立。一人守隘。千人莫能踰。後世避兵者因之。立砦。一曰龍井。仙春。薛村山巔。洞中有井。如石。春旱不竭。澇不瀦。山

菊叢生水甘如醴可以療疾常有巨蛇守之一曰瓦關對峙瓦橋關在其西三里南北兩山對峙如門戶淇水流其下北山古廟前大石十丈旁有方孔二十四上有圓孔一相傳柳展雄樹幟守隘處一曰淇河西流在其前縈洄如帶盛則西流竭則東注漢沛郡太守鄭公渾築陂民利之此八景在堀坊十里內皆先賢登臨所至

堀坊村堀突也一作窟孔穴也言地形突然高起中有孔穴可通山川之氣坊以蓄水亦以鄣水水經注蕭有梧桐

陂亦名鄭陂蓋上承淨淨溝下通濰水卽此地也

先賢子張子故里在蕭縣南堀坊村蕭子宋附庸國古紅地春秋大蒐于紅卽此按分野介房心之次疆域東近青徐北達魯衛南通江淮西連梁楚岡陵四合大河環流號文物之邦子張子其先陳人世居宛邱之下從學孔子往來鄒魯道經蕭子國覽山川雲物之盛遂卜居蕭西南二十里冑陵山之陽築室而處孔子沒子張在魯心喪三年畢與其友閔子騫同歸於蕭厥後閔子徙宿子張與子申

詳守蕭不變及終塋於堀坊村前臨淇河後據昇高山西
去故宅八里三世申詳次子鼎携子如魯家於鄒或隱陳
之西華或寓趙今聚族於蕭者本宗居冒陵而外曰杜馬
莊曰假頭村曰陽塢各堡總隸仁壽鄉七圖六甲 以上八
條見堀坊志

顓孫子書

崇川馮雲鵬校刊

宗子世表

二代申詳生於魯國因名魯人師事子思繆公尊以賓
禮娶言氏子游女也生二子曰鍾曰鼎

年表申詳生於魯國名魯人子張之子也母曾氏以
哀公十四年庚申生因名申當西狩獲麟之異原名
祥後書今名十二歲出就外傳十七歲娶子游女言
氏二十歲生子鍾二十三歲生子鼎二十八歲師事

子思尊父訓也三十七歲有父之喪公明儀爲相塋
於蕭城南堀坊村四十一歲長子鍾請學詔以子思
教子白之法尊詩書禮樂以束治心性無陷曲學朝
夕當乾惕也五十七歲次子鼎慕先王遺風携子如
魯家於鄒至今鄒縣孟子林東有子張祠子孫蕃衍
一北宗也七十三歲魯穆公尊禮子思以公儀休爲
相泄柳申詳爲臣休之相魯拔葵去織節儉正置泄
柳義不苟合三子並稱其賢可知矣沒塋堀坊子張

子墓東南十餘步載祀典

三代鍾請學於申詳申詳曰吾聞子思之告白也夫子之教也必始於詩書終於禮樂而曲學不與焉生一子文

四代文博學強記淹貫六經魏召爲相不受著書萬言悉皆心性之學生二子曰江曰河

五代河生子羨

六代羨仕於趙生子球

七代球言行篤實修書築墓生子冲

八代冲字太元因秦焚書滅儒遂隱於三台山藏書石室至今有井洞遺跡相傳爲太元藏書處生二子曰延慶曰延齡

九代延慶生子澣心

十代澣心爲長沙太守生子茂春

十一代茂春生子簡

十二代簡博學好古纂修遺書漢昭帝徵爲博士生子

萃

十三代萃生子湛

十四代湛生子園

十五代園天姿明敏正直不阿因王莽篡位避而不仕

生子永久

十六代永久生三子嘉善嘉言嘉行

十七代嘉善生子標

十八代標生子寧

十九代寧生子克柔

二十代克柔晉武帝泰和元年授太常寺生子東

二十一代東生子無欲

二十二代無欲生子鳳

二十三代鳳生三子應泰應禎應祥

二十四代應泰事母孝修築祖墓生子光

二十五代光好爲古文詞著書二十二篇生子珙

二十六代珙恢廓大度魏舉孝廉生子奎

二十七代奎生子良

二十八代良晉秘書郎生子實

二十九代實生子存

三十代存北齊天保二年封子張爲蕭伯存奉祀生子

源

三十一代源周武帝改封子張爲陳伯授源博士奉祀

生子燕

三十二代燕隋文帝時爲涇州司戶生子椿

三十三代椿唐高祖武德元年召襲博士奉祀生子遠

三十四代遠生二子曰通曰達

三十五代通生子登

三十六代登唐元宗開元四年召爲國子監博士生子

高

三十七代高生子淳

三十八代淳唐憲宗元和十年授少府監主簿生子恭

三十九代恭唐懿宗顯通元年明經及第授國子監博

士生子宣

四十代宣生子循

四十一代循當五季之亂隱居躬耕生子熙

四十二代熙聰明穎異八歲能文後爲戶部員外郎生子允

四十三代允生子宏毅

四十四代宏毅生子書紳

四十五代書紳宋眞宗大中祥符元年追封子張爲宛

邱侯賜墓週祭田五頃四十畝給奉祀官一員世奉

祀事生子晉

四十六代晉襲封奉祀重新祠宇生子坎

四十七代坎奉祀修墓生子訂

四十八代訂奉祀築堤護墓生子孔臣

四十九代孔臣生子皞

五十代皞金人陷徐州入淮泗毀祖墓宋高宗南渡遂

避河南隱姓西華縣生子問明

五十一代問明生子燧

五十二代燧生子應芝

五十三代應芝闢釋老之說著滌塵十二篇生子瑾

五十四代瑾癖耽琴鶴爲范陽教諭生子棟

五十五代棟仕元後退隱河南西華縣嘗對子誌嘆曰
蕭吾故土也先人之墳墓在焉不可流離忘歸子其
旋返世守無失烝嘗之祀生子誌

五十六代誌不忘父訓明洪武二年回蕭守墓仍築室

於閔子御車掣牛坂之東生二子曰禮曰裕

五十七代禮生員生四子崇儒崇治崇書崇學

五十八代崇儒字象賢生員生子銓無嗣

五十八代崇治奉祀生員生三子曰儀曰釗曰海

五十九代釗奉祀生員生二子曰祿曰杲

六十代杲奉祀生員生子守經

六十一代守經奉祀生員生子岱

六十二代岱字華峯廩生入監善詞賦好山水重修祠

墓襲奉祀官生子承恩承惠

六十三代承惠字澤甫號繼華儒學生員襲奉祀官築堤修墓建祠於邑治西門外詳請給贊禮生四名春秋致祭

國朝康熙元年以子佐聖官贈江西臨江府峽江縣知縣壽八十四生四子依聖輔聖翼聖佐聖

六十四代依聖字心孔奉祀生員言行敦篤生子尊賢六十四代佐聖字悅孔奉祀生員入學食餼順治八年

恩貢 廷試推官改授江西臨江府峽江縣知縣五
年復補吉安府泰和縣知縣生子景賢好賢

六十五代好賢字樂只儒學生員生子誠道

六十六代誠道字完初監生

國朝雍正三年三月恭逢

恩詔爲先賢顯孫子設立博士查顯孫誠道委係嫡裔於

雍正三年九月奉

旨授爲翰林院五經博士世襲主祀生子明德

六十七代明德乾隆二十一年九月承襲翰林院五經
博士主奉祀事生子宏傳

六十八代宏傳因病未襲生子開瑞

六十九代開瑞緣事不應承襲

七十代樹勲係尊賢之後尊賢生子達道達道生子成

德成德子宏績績子開來來子奕桂桂子世增增子

樹勲道光九年二月承襲翰林院五經博士主奉祀

事